

DISSERTATIO MEDICA

INAUGURALIS,

Utrum ad Infitionem in Variola necne
debeat confugi, ostendens.



Digitized by the Internet Archive
in 2020 with funding from
Wellcome Library

DISSERTATIO MEDICA

INAUGURALIS,

Utrum ad Infitionem in Variola nec-
ne debeat confugi, ostendens.

QUAM,

ANNUENTE SUMMO NUMINE,

Ex Auctoritate Reverendi admodum Viri

D. GULIELMI ROBERTSON, S. S. T. P.

ACADEMIÆ EDINBURGENÆ Praefecti,

NEC NON

Amplissimi SENATUS ACADEMICI consensu,

Et nobilissimae FACULTATIS MEDICÆ decreto;

PRO GRADU DOCTORIS,

SUMMISQUE IN MEDICINA HONORIBUS AC PRIVILEGIIS

RITE ET LEGITIME CONSEQUENDIS;

Eruditorum examini subjicit

JOSEPHUS PEREIRA DE CASTRO,

LUSITANUS.

SOC. MED. EDIN. SOC.

Ad diem 24. Junii, hora locoque solitis.

EDINBURGI:

CUM PRIVILEGIO.

TYPIS GULIELMI CREECH.

M DCC XGIII.

DOMINO JOANNI,

PRINCIPI BRASILIÆ ILLUSTRISSIMO ET
POTENTISSIMO,

JOSEPHUS PEREIRA DE CASTRO

S. P. D.

*TRIENNIO et supra in studio artis Apollineæ, hac in Academia celebri, consumpto, et tempore igitur appetente, quo mihi summos medicinæ honores attingere liccbat, ne quidem in unum momentum potui dubitare, cuinam illam dissertationem inauguralem, quam instituta academica ab unoquoque studioso constanter exigunt, deberem consecrare. E memoria etenim mihi, Princeps Maxime, neutiquam exciderunt, nec unquam, annis labentibus, excident, beneficia summi momenti, quibus me benignus et generosus fueris dignatus afficere. Hoc praecipue in causa fuit, cur Infectionem Variolae exequendam susceperim, quod tibi in primis gratum acceptumque fore credidi, si mihi ulla argu-
menta,*

menta, quibus tibi subditi, quos patrio amore semper prosecutus es, ad usum praxeos hujusce salutiferae frequentem et quotidianum allici possent, in medium proferre contingeret. Deus optimus et maximus faxit, ut tempus non longe absit, quo, hac ubique recepta, et vinculis erroris disruptis, stragibus horrendis, quas morbus sponte accedens apud eos longe lateque saepe edidit, quaeque tibi, qui commodis populi tui, omnibus in rebus, consuli et prospici velis, summo dolori non esse non potuerunt, efficaciter incipiant occurrere.

Quaecunque sunt bona et optabilia, ea omnia tibi abunde contingant; et solio avorum, per longum annorum decursum, insideas, ab omni parte beatus, et felicitatem in universas imperii tui partes diffundens. Vale.

EDINBURGI dabam, 16to calendas }
 Julii, anno Salutis Humanae 1793. }

DISSERTATIO MEDICA

INAUGURALIS,

Utrum ad Infitionem in Variola nec-
ne debeat confugi, ostendens.

AUCTORE JOSEPHO PEREIRA DE CASTRO.

I. **E**X quo medicinae, hac in regione, stu-
dere coeperim, et, cum summis attentione et
admiratione, doctrinas non solum hodierno-
rum, sed etiam antiquiorum, et audire et le-
gere, non sine moerore, immo horrore, nota-
vi, partem generis humani immensam fato,
sponte, et sine ulla causa, cessisse, et semet,
ut praedam intempestivam, manui mortis ra-
pienti obtulisse. Non quidem, sine summa
4 A indignatione,

indignatione, possum contemplari, tantum injuriae naturae humanae, eam periculis multis horrendis, quae facillime potuerunt vitari, objiciendo, illatam fuisse. Igitur non ulterius progredi possum, quin stuporem verbis enunciem, tantam tribus Apollineae partem, caecitate abreptam, doctrinas repudiasse, quae ratiociniis justis rebusque veris, bene et firmiter stabilitis, innituntur, quales sunt, exempli gratia, effectus admodum salutares insitionis in variola, operationis quidem, quae beneficiis summis, quae Providentia divina in mortales conferre dignata est, non sine ratione gravissima, potest accenferi.

II. Igitur, si infeliciter accadat, ut aliquis sit, qui amore contradictionis imbutus, opinionem singularem suffulciens, vel averfatione dedecorosa cogitandi, vel examinandi argumenta, fundamento stabili et certo innitentia, quae a scriptoribus seculi praesentis dignis

nis et attentis generose fuerunt suppeditata, oppressus et degravatus; immo, si aliquis sit, qui, per dubitationes futes et leviculas, animos eorum terrore afficit, qui iis principiis destituti sunt, quae, de operatione tam utili et facili, ad iudicandum sunt necessaria, ei pudori aeterno sint ea, quae, summo cum suo honore, a nationibus felicioribus et eruditioribus exculta et detecta sunt, praesertim a Britannis, quorum fama, singulis diebus, fluente copiosiore latius longiusque diffunditur.

III. Idcirco, cum mecum saepe serio et attente reputaverim, quanto periculo genus humanum quotidie objiciatur, ignarum se a morbo tam funesto, quam variola est, posse servari, mihi in votis maxime sinceris non esse non potuit, ut insitio innotesceret, omnibus hominibus a medicis fortiter suaderetur, et etiam legibus praescriberetur, in iis regionibus, ubi adhuc non rite intellecta est. Namque

que ita ii, qui variola nunquam ante laboraverunt, vitas suas adversus tantum periculum tutas reddere possunt. Igitur ea argumenta in medium proferre conabor, quae, ut fidem utilitati praxeos tam humanae ex toto habeam, faciunt.

INSITIONIS COMMODA.

IV. Necessarium erit notare eorum numerum, comparatione instituta, qui variola infectiva et naturali extingui solent; namque conclusiones, quae insitioni favent, nunc, ultra omnem dubitationem, rationibus stabilitae et confirmatae sunt, quas viri clari Turi-
ni, Timoni et Pylarini, et etiam vir indefessus Black Londinensis multique alii reddiderunt, qui non parum operae in supputationibus, per tabulas mortuorum, faciendis posuerunt, uti discrimen inter hosce duos nume-

ros comperirent. Monstrarunt, vix unum e ducentis variola infectiva mori. Caeterum commoda infectionis, quantum signa morbi spectat, summam nostram attentionem in se convertere debent.

V. Experientia ostendit, variolam naturalem feбри petechiali frequenter stipari, quae saepissime exitio est. Res verò rarissime ita sese habet in specie infectiva. Quinetiam hic pro certo habetur, morbum totum suum decursum, sine minima etiam perturbatione vel periculo, absolvere; et pulchritudinem nihil detrimenti omnino inde capere. Nec hanc unquam exceperunt ophthalmiae, furunculi, vel ulla alia vitia ingrata, a metastasi materiae variolosae ad partes corporis diversas proficiscentia. Insuper indubitabile est, hanc feбри secundaria nunquam stipari, in morem variolae naturalis, quae hac nunquam carere solet,

folet, si adest ullus magnus pustularum numerus.

VI. Modus quoque virus variolosum inferendi hoc commodum habet, medicum illius vitae temporis annique tempestatis delectum habere posse, quibus poni potest, aegrotum morbum facillime tolerare valere, et optimum ex eo commode emergendi casum habere.

VII. Praeterea, cum ad insitionem decurritur, contagio eo tempore corpori, quo valetudine commodissima fruitur, applicari potest; et, si ita eveniat, ut, aliqua ex parte, male afficiatur, operatio potest differri, donec omnia rursus ad sanitatem reducantur, et corpus ad perferendum morbum rite accommodetur. Cum vero, contra, variola epidemice grassatur, unumquemque, qui ea non antea laboravit, sine discrimine aetatis, sexus, vel conditionis

ditionis corporeae, invadere periclitatur; adeo ut nonnunquam eos, quibus vires morbis praecedentibus jam fuerunt convulsae, et etiam gravidas et puerperas, &c. corripuerit.

VIII. Insuper vir clarus Camper opinatur, tumorem manuum et pedum, et salivationem, quae pro signis salubribus, cum, per decursum variolae naturalis, semet ostendunt, haberi solent, ab eruptione numerosa sola proficisci, et per infitionem, quae numerum pustularum diminuit, tantum praecaveri posse.

IX. His accedit, quod variola naturalis inflammatione faucium, et tussi, die septimo, octavo nonove ab eruptione, stipari admodum periclitatur. Haec autem signa, ut neminem fugit, et aegroto et medico multum molestiae faciunt. Cum vero numerus pustularum faucium et asperae arteriae, per infitionem

onem

onem solam, possit diminui, quantum beneficium et levamen haecce praxis secum adferat, clarum et manifestum est.

X. Quinetiam multi scriptores exempla supurationum dolentium innumera memoriae produnt, quae, subter cutem, in artubus, et saepe in cartilaginibus, incidere solent. Phthises quoque, asthenias et abortus a variola naturali saepe oriri memorant. Nullus vero ex hisce morbis infitionem unquam excipere fuit notatus.

XI. Supra posui, infitivam variolae speciem pulchritudini nihil injuriae inferre; quod pustulae numero plerumque paucae sunt. Et, quanquam pustulae interdum per infitionem progenerari possunt numerosae; nunquam tamen concurrunt, et tali modo assidue decidunt, ut nullas fovealas, vel cicatrices infignes relinquant.

XII. Praeterea, observatio attentissima, et res verae hodie constanter, sine omni dubitatione, ostendunt, eos, quibus virus variolosum fuit semel insitum, nunquam in posterum infici. Namque multa experimenta hanc rem illustrandi consilio fuerunt instituta, et omnia veritatem ejus confirmant. Quanquam nonnulli auctores sunt, aliquos, qui insitionem subierunt, variola naturali postea fuisse correptos; exempla tamen innumera et experientia quotidiana hosce rumores, quibus nonnulli serviunt, falsos esse demonstrant. Et si ullae notae sint, quae hosce rumores moverunt, a variola anomala originem deduxerint necesse est.

XIII. Vir clarus Dimisdalius memoriae tradit, eruptiones recentes, in multis suorum aegrotantium, et aliis insitoribus etiam demandatorum, febre aliisque signis, postquam complures pustulae apparuerant, et stadium

eruptionis ad finem perductum esse visum est, levatis, nihilominus incidisse, et, in dies quatuor, quinque, vel etiam sex continuos, apparere perrexisse, et eas dolorem capitis levem interdum antecessisse, quanquam frequentius in conspectum, sine ulla nova molestia, venerunt. Hoc ortum hisce rumoribus praeberere potuisse judicat, et hos falsos esse e suis observationibus demonstrat; quod, in omnibus ejus generis exemplis, messis pustularum secunda vel posterior, intra spatium temporis progressui variolae insitivae vulgo concessum, semper incidit, et antequam inflammatio brachii cessaverat. Et nunquam incidit, nisi in illis, in quibus, post levem eruptionem et levata signa, morbus omnino finitus esse praemature fuit judicatus. Ægrotantes igitur hujusmodi curati esse positi sunt, et pro talibus ab iis, qui eos nutriebant, habiti.

XIV. Hujuscemodi sunt ea, quae omnes medici celebres, qui hoc argumentum sunt executi, asseruerunt. Caeterum silentio non praetereundae sunt affirmationes medici, doctoris nempe Farquharson Edinensis, cujus doctrinam ingeniumque magnopere miror, et plurimi semper faciam. Me iterum iterumque certiore fecit, se, variolam post infectionem oriri, nunquam aut vidisse, aut audivisse. Asseverationes ejus autem non tantum theoriae sanae, sed etiam usui practico, longe lateque patienti, innituntur; namque hanc operationem, in vices fere innumeras, peregit, et, summa confidentia, morbum de novo oriri posse negat.

XV. Aliud infectionis commodum minime neglectui habendum est, medicum nempe quantitatem materiae contagiosae perquam exiguum tantum in corpus invehere posse,
et

et ejus esse opis eam corporis partem, quam maxime idoneam esse judicet, feligere.

XVI. Haec autem beneficia, et alia, quae ab insitione viri variolosi profluere experientia docet, manifeste magna et numerosa sunt. Sed nunquam mihi in ullam sententiam de re ex toto concedere potui persuadere, donec omnia, utramque quaestionis partem spectantia, animo serio perpenderam. Postquam hoc consilio auctorum diversorum, qui de hoc argumento egerunt, opiniones diversas legeram et examinaveram, utrum ad alterutram opinionem propenderem, mecum serio attenteque reputavi. Nunc autem libere candideque non affirmare non possum, idem illis omnibus, qui de utilitate insitionis variolae opinione differunt, ad ultimum, commodum nempe generis humani, exoptatum et quaesitum fuisse. Et hoc mihi satis esse videbatur, cur eos amore et reverentia prosequerer. Si qui
vero

vero sint, qui opinionem sibi propriam argutiis pravis propugnare conati sunt, eos prae-
dae indignationi, saltem contemptiioni omnium, quotquot sunt, honestorum relinquo.

XVII. Quod primum mihi, de hac re cogitanti, faciendum putavi, id fuit comperire, si fieri posset, rationem veram, quae inter eos, qui e variola naturali emerferunt, et eadem extincti sunt, intercederet. Hoc consilio, hanc in rem accurate inquisivi, et e rationibus, quas Black Londinensis reddiderit, et e tabulis mortuorum didici, eos, quos variola, intra duodecim annos, ab anno nempe 1715 ad annum 1728, rapuerat, 27367, vel propemodum 2300 quotannis, adaequare.

XVIII. Quinetiam e Boylston compertus sum, homines, in Nova Anglia, anno 1721, et anno 1722 ineunte, 5759 variola naturali

rali laboravisse, e quibus 844 fato functi sunt.

XIX. Commodis infitionis hoc modo delineatis, qua ratione possint comparari ostendere non alienum fore duco. Igitur viam illam, quam certissimam, simplicissimam, et igitur facillimam esse opinor, operationem infitionis perficiendi exponere aggrediar.

MODUS VIRUS VARIOLOSUM INSE- RENDI.

XX. Cum tot, de ratione variolam inferendi, a multis auctoribus diversis jam dicta sint, ea, quibus solis nosmet circumscribere debemus, esse videntur, aetas, constitutio corpora, tempestas anni, materia adhibenda, modus operationis et regimen.

ÆTAS.

Æ T A S.

XXI. Quantum aetatem aegroti, viro varioloso inficiendi, spectat, Dimsdalius ait, se, cum delectum habere liberum permetteretur, pueris, nondum biennibus, materiam contagiosam inferere constanter noluisse.

XXII. Cullenus celeberrimus ad infitionem, prima dentitione finita, et antequam tempus pubertatis accessit, commodissime posse decurri memoriae tradit.

XXIII. Vir clarus vero Kirkpatrick, qui de hoc argumento tam bene scripsit, aetatem, a quadriennio ad septennium, pro tempore infitionis optimo habet. Haud dubie vero unus puer infitioni aequè aptus esse potest, tres annos habens, ac alius, qui annum aetatis quartum

tum attigit, vel eundem transgressus est. Igitur, me iudice, si nihil est, cur variolam in loco, ubi degitur, ejusdemve vicinia, epidemice grassari brevi periclitari suspiceris, hac operatione debet abstineri, donec dentitio praeterierit, quoniam pueri, quibus nondum multum aetatis accesserit, patent omnibus periculis dentiendi, febrium, fluxuum, convulsionum, aliorumque malorum, quae per se, aetate tam tenera, curatu fatis sunt difficilia. Namque, dentitione absoluta, proclivitates horum puerorum naturales manifestiores evadunt, et igitur facilius tractari possunt. Quinetiam functiones vitales, pro rata parte, corroboratae evidenter testantur, integumenta eorum nunc aequè morbo accommodari, ac unquam postea esse possunt. Adhuc ponere possumus, ex iis paucissimos ullo ejus metu affici, et, cum operationem instituere statutum est, multi eorum in eam facile illici possunt, ne minimo quidem ullius morbi subsecuturi

turi excitato. Infuper, circa hoc tempus, pueri plerumque tractabiliiores evadunt; et, si puellula fit inficienda, pulchritudinem suam tanti aestimare incipere confuevit, ut partes externas affectas scabendo vel carpendo, si ad hoc faciendum proclivis fit, abstinere ei possit suaderi. Praeterea, si eruptio major, quam quae in illis, quibus, circa hanc aetatem, virus variolosum est inditum, incidere confuevit, semet ostendat; haec aetas, quam inferior, multo commodior est. Namque aegrotantibus infelicibus, iusto junioribus, ut remedia idonea adhiberi patiantur, nec monitis, nec minis, nec muneribus potest persuaderi. Licet supra comprehensa, in hoc paragrapho, protulerim; minime tamen intelligatur, me virus variolosum pueris, antequam dentes illis fuerunt orti, inferi vetare, aut praxin illam repudiare, si modo in urbibus amplioribus degent. Namque in locis hoc genus contagio plerumque adest, et summae

imprudentialae foret, pueris commodis, quae infitio secum adducit, felicissimis interdicere, et eosdem, ad extremum, periculo variolae naturalis horrendo, semperque omni ratione fugiendo, objicere.

XXIV. Quousque, quantum senectutem spectat, pergere possimus, si nunc considerarem; affirmationes viri clari Timoni habemus, infitionem in hominibus omnium aetatum, ne uno quidem ea mori reperto, fuisse institutam.

XXV. Pilarini inquit, uti judico, cautius et verius, effectus nocivos, raro aut nunquam, inde fuisse profectos; quanquam, in hominibus omnium aetatum et temperamentorum, fuit peracta.

XXVI. Dimisdalius celebris quoque septuagenariis virus variolosum, et cum effectibus
faustis,

faustis, inferendum curavit. In summa vero plane confiteor, animum non mihi inclinare, ut ad sententiam generosorum, qui senio tantum confidunt, accedam. Etenim comperimus, constitutiones singulares corporeas non deesse, quae contagionem recipere non posse videntur. Igitur si qui senectutem attigerunt, et contagio saepe antea fuerunt objecti, et id nihilominus effugerunt; eos morbo subicere non tantum temerarium, sed etiam minime tutum foret. Nos enim minime latet, circuitum sanguinis in senioribus magis debilem esse, rigiditatem vasorum majorem, calorem animalemin diminutum, integumenta corporis ficciora, et perspirationem saepe solito parciorem. Quae omnia facerent, ut eruptio admodum difficilis foret, et sanguis, ob contagionem ei admistam, foedaretur; quod morbum aliter perplexum confusumque reddere posset. Et si signa concitiora evaderent, aegrotus, ob vires sibi convulsas,

vulfas, morbo succumbere periclitaretur. Si vero eruptionem omnino rite procedere poneret, non parum minitantur periculi tarda parumque perfecta suppuratio, et ea ad gangraenam proclivitas, cui senectus, ob alias quoque causas, tam opportuna est.

CONSTITUTIO CORPOREA.

XXVII. Quantum ad hanc attinet, liceat observare, homines malis chronicis variis laborantes, et alios habitu corporis scrophuloso, scorbutico et arthritico praeditos, in numerum eorum, qui ad hunc morbum accipiendum accommodati esse judicati sunt, fuisse admissos; et insitionem in iis, qui hisce morbis conflictati sunt, cum successu prospero, revera fuisse peractam. Et exempla habemus, ubi etiam constitutiones corporeae illis, post insitionem,

infitionem, in melius haud dubie fuerunt converfae. Caeterum, meo iudicio, praxi rationali confentaneum effe videtur, ut aliquantum curae adhibeatur, quo corpus, faltem tempore infitionis, omni alio morbo, quantum fieri poffit, careat; ne natura in variola rite progeneranda, maturanda, vel idonee expellenda impediatur, aut retardetur; vel ne ponderi duorum morborum, eodem tempore urgentium, succumbat. Igitur exiftimo, morbos eruptione ftipatos et cutaneos, qui nomen mali fibi merentur, fine ulla fere exceptione, conditionem huic operationi parum idoneam conftituere videri. Idem omnino de vifceribus inflammatis aut ulceratis dici poteft, quoniam caufa, cur partes inflammatas, vel exulceratas, irritatum iri metuamus, iufta minime deeft.

TEMPESTAS

TEMPESTAS ANNI.

XXVIII. Quinetiam non notare non possumus, parum nihilve rationis temporis anni fuisse habitum; namque ad insitionem, omnibus tempestatibus, et cum successu exoptato, fuit confugitum.

XXIX. Caeterum autumnum tempestatem parum commodam esse opinor; quoniam, hoc anni tempore, ut omnes norunt, morbi epidemici vulgo invadunt, praesertim dysenteriae, febres intermittentes et anginae malignae, ut Celsus immortalis memoriae posterorum tradidit. Idem auctor quoque notat, hyemem morbos inflammationem habentes inferre, aestatem putredinem augere. Igitur cum haec res minime possit negari, admodum probabile

babile est, infitionem quaedam commoda, vel a frigore, vel a calore intenso vitato, deducere posse.

XXX. Si Timoni fides habenda est, haec operatio, vel hyeme ineunte, vel vere, fieri potest. Pylarini memoriae prodit, Graecos hanc operationem, tempore hyemali, absolvere consuevisse, quamvis ver quoque pro tempestate, infitioni idonea, cum tunc fieri potest, habet.

XXXI. Confitear vero oportet, memet virus variolosum corpori humano, qualibet tempestate, inferere minime dubitaturum esse, si, eo tempore, saeviunt, nec morbi epidemici, nec inflammationem habentes.

MATERIA

MATERIA ADHIBENDA.

XXXII. Quantum materiae, quae debet adhiberi, qualitatem spectat, res verae innumerae non defunt, quae nullam ejus rationem habendam esse testantur; namque prava materia bene cessit, et laudabilis detrimento fuit, et vice versa. Nullum vero commodum, quod noverim, a pure malo deduci potest; et idcirco, quo omnis suspicio amoveatur, materiam, per stadium morbi mite, extractam, corpori inficiendo inferere praestat.

MODUS OPERATIONIS.

XXXIII. Si omnes rationes diversas pusvariolosum in corpus invehendi, quae ab auctoribus

toribus diversis in usum fuerunt revocatae, commemorarem, parum prodesset, et enarrationis lectorem forsitan magnopere toederet. Igitur nihil aliud quam rationem, qua uti decreverim, designabo.

XXXIV. Apex lanceolae, materia vel pure pustulae humectatus, per cuticulam introduci, et cutem veram tantum tangere debet. Longitudo incisionis tam brevis fit, quam fieri potest.

XXXV. Locus hujusce vulneris, perquam simplicis et exigui, in ea brachii parte esse debet, ubi fonticuli aperiri consueverunt. Admoveri non debent emplastrum, fascia, ullumve tegimen, nec, ex ulla parte, opus sunt; sed, ut vestimenta materiam non abstergeant, tantum agendum est.

R E G I M E N.

XXXVI. Quantum ad praeparationem corporis attinet, in ea, in mensem, in duas hebdomadas, in dies duodecim, decem novemve, ante infitionem, perficienda fuit elaboratum. Camper vero, Gatti, Ranby, Dimfdalius, et alii, omnem praeparationem neglectui habuerunt, et inter omnes eam omnino supervacaneam esse convenit.

XXXVII. Longius etiam progreditur Camper, et praeparationem, tres ob causas, nocivam esse putat. 1. Quod natura contagionis ignota est. 2. Quod, per spatium praeparationis, aegroti, in quos virus variolosum indendum est, aliquantum molestiae quotidianae a metu derivant. 3. Quod, variola epidemice grassante, homines, viro varioloso imbuendi,

imbuendi, per moram, morbo naturali obji-
ciuntur.

XXXVIII. Cibo animali vero, liquoribus fermentatis, et omnibus, quae dotes manifeste calefacientes habent, abstinere convenire judico. Namque diathesin corporis, et inflammatoriam et putridam, intendere possunt, adeo ut aegroti adversus morbum graviores minus tuti reddi periclitentur.

XXXIX. Quae supra comprehendi, ea tempus tantum, ante infitionem peractam, spectant. Proximum est, ut ea, quae, post diem infitionis debent adhiberi, leviter percurram.

XL. E die infitionis, regimen antiphlogisticum solum et stricte adhibendum. Purgantia, refrigerantia, et acida in usum revocanda. Si signa inflammationis concitatoria et violentiora

tiora sint, sanguis detrahi debet. Hoc vero raro necessarium est; namque applicatio aëris frigidi, ususque potionis frigidae, sunt potentiora et efficaciora remedia. Usus corticis Peruviani hic raro deponitur. Sin vero eum notae requirant, effectus ejus neminem latent. Vinum ei adjungi potest, cujus effectus quoque notissimi.

XLI. Diagnosin hujusce innocentis morbi silentio fere praeteribo; namque si punctura, materiae recipiendae facta, rite attendatur, species, quam prae sese fert, medicum de morbi progressu certiore faciet. Etenim si, secundo tertiove die, post insitionem peractam, pars lentis ope conspiciatur, aliquantum labis, colore aureae, circa incisionem, semet ostendet, et cutis ei circumdata contrahi videbitur. Quarto quintove die, digito admoto, durities percipitur. Pruritus in parte, quae leviter inflammata esse videtur, sentit

sentit aegrotus. Circa sextum septimumque diem plerumque percipitur nonnihil doloris in axilla. Haec autem sunt signa, quae rite pro notis morbi genuinis possunt haberi, et unde pro certo discere valemus, effectus felicissimos incisionem esse subsecuturos. Si vero haec signa ferius, quam modo positum est, appareant, minus grata sunt; namque supurationem tardam, &c. significant.

XLII. Univerfus morbi progressus plerumque talis est, qualis nihil auxilii a medicina requirit. Si vero aliquid insolitum eveniat, nunquam istiusmodi est, ut ullum metum experto medico incutere possit.

XLIII. Hisce consideratis, ad ultimam hujusce dissertatiunculae partem transibo, in qua de historia infectionis agetur.

HISTORIA

HISTORIA INSITIONIS.

XLIV. Postquam usus infitionis felices notaveram, et de iisdem serio cogitaveram, non-nihil operae posui in conando reperire, quisnam hanc operationem primus detexerit. Omnia vero conamina ex toto fuerunt supervacanea. Namque inventor, aequè ac tempus locusque inventi ipsius, non tantum incolas Europae, sed, quantum noverim, Asiaticos ipsos, unde artem accepimus, omnino latent.

XLV. Forfitan non improbabile est, eam reperiri potuisse aliquo casu, sine ullo consilio ratiociniove medico, et ab indocto pauper-culo, qui scientiam a coelo solo deduxit, qui-que, ob conditionem regionis natalis rudem et illiteratam, memoriae posterorum nunquam traditus est. Quicumque vero fuerit, multo
plus

plus de genere humano meretur, quam multi, quibus statuas posuit favor civium.

XLVI. Cassem Aga, qui ad Britanniam, Georgio primò rerum potiente, legatus missus est, affirmavit, infitionem variolae tamdiu Tripoli, Tuneti et Algerii, invaluisse, ut nemo primum ejus ortum potuerit meminisse; et non tantum ab incolis urbium, sed etiam ab Arabibus ipsis ferocibus, in usum fere universum revocari solere.

XLVII. Timoni suam infitionis historiam ad Societatem Regiam Londinensem, anno salutis humanae 1713, a Byzantio, mittendam curavit, in qua memoriae prodit, eam ab incolis Circassiae et Georgiae in illam metropolin, ante quadraginta annos, fuisse invec̃tam.

XLVIII. Epistola a Pylarini conscripta annum 1701 etiam, quo tempore Byzantii fuit, respicit.

respicit. Ille quoque affirmat, inventorem esse ignotum, et artem primum in Graecia, praefertim in Theffalia, in usu fuisse.

XLIX. Neminem vero fugit tempus, quo in Britanniam primum immigraverit, et incolae a strage horrenda, quam variola naturalis edere confueverit, liberati sint. Primum infitionis periculum, nono Augusti die, anno orbis redempti 1721, in quibusdam morte damnatis, qui carcere, vulgo Newgate appellato, detinebantur, institutum est; et cum successu tam prospero, ut, brevi postea, complures procerum eidem operationi semet objicere non dubitarint. Et, anno 1722, quidam e familia regia exemplum eorum sunt imitati. Intra triennium quoque, quod proxime elapsum est, hominibus 447 virus variolosum fuit insertum.

F I N I S.